



*Iacob prend pour femme Lya, & Rachel, laquelle en sa vieillesse
enfanta Ioseph son fils.*

A PRES que Iacob eut remarqué la pierre où il auoit veu la vision, il fit vœu au Seigneur, si son voyage estoit prospere, qu'il seroit son Dieu, & la susdite pierre seroit la maison d'iceluy. Or en poursuiuant son chemin, il vid vn Puy, & trois troupeaux avec leurs pasteurs, desquels il s'enquit du bon deportement de Laban son oncle; mais Rachel, y survint avec les troupeaux de son pere Laban. Adonc Iacob s'approcha, & baïsa Rachel, luy disant, le suis fils de Rebecca, sœur de vostre pere Laban; ce que Rachel fit sçauoir à son pere, qui receut Iacob avec grande ioye, & luy promit, qu'en le seruant sept années il luy donneroit Rachel à femme; mais le temps accompli, Laban fit coucher avec Iacob son autre fille Lya, au lieu de Rachel, dont Iacob se plaint fort, & regrette Rachel; & pour l'auoir à femme, se soumet à seruir Laban encore sept années; ce qu'il fit, puis obtint sa demande. Rachel & Lya furent quelque temps steriles, occasion qu'elles baillerent leurs seruantes à Iacob, dont il eut quelques enfans. Toutesfois enfin Lya & Rachel eurent plusieurs enfans masles, dont les premiers fils de Lya furent Ruben, Simeon, Leui & Iuda. Et Dieu ayant pitié aussi de Rachel, elle enfanta à Iacob vn fils nommé Ioseph, qui fut le bien-aimé du pere.